

摘藻堂四庫全書薈要

集部

欽定四庫全書薈要

集部

滄溟集卷七

八



詳校官候補通判經歷臣郭祚熾

欽定四庫全書薈要卷一萬七千一百三十

集部


滄溟集卷七

明 李攀龍 撰

五言律詩

春日閒居

十首


即令關請謁何用乞江湖僻性終難狎浮名本易汙杜
門人事過欹枕歲華徂薄俗還堪畏崎嶇比宦途

其二

白日移高枕青山答放歌病纔宜偃蹇老自厭婆娑禮

數諸生絕交遊二仲多江湖春正滿更欲混漁蓑

其三

藥餌休官嬾蓬蒿謝客深濁醪殊解事高枕自知音
老
大翻陵勁文章豈陸沈浮雲終日在瀟灑竟何心

其四

五穀功名薄雙龍羽翼乖風塵凋短褐雨雪閉高齋
慘
淡幽人色飛揚壯士懷少年何太苦妖冶事形骸

其五

奉使談經日單車西入關掄才牛口下得士鳳毛間白
雪千人失黃河萬里還即今高卧處猶不減商山

其六

乞歸君已見削迹我何求交態疎能變時名久自休中
原來病色萬里入春愁不是忘機客還驚海上鷗

其七

結舌論文地甘心養拙年朱門人自老白雪調空傳世
路蓬蒿外浮名燕雀前中原二三子夙昔共周旋

其八

病起獨登臺春光萬里來浮沈還我輩俯仰見人才
華髮風塵過青山雨雪開浮雲堪倚杖落日好銜杯

其九

漂零唯濁酒落拓總狂生彭澤差聞道高陽橫得名
罷來詩慘淡卧久興淒清日對春湖色潺湲嬾濯纓

其十

五柳惜湖濱先生隱是真文章堪側目潦倒竟全身何

必論交地長須縱酒人即令東蹈海斷不混風塵

夏日東村卧病 十二首

平生偏伏枕暇日是抽簪病著青山色愁高白雪音雲
霄懸出處踪跡間浮沉不必名俱毀方知二仲心

其二

放歌知帝力縱飲見天真綵筆風雲老青樽日月新詩
驚噉蔗客酒讓采薇人即使妨幽事何須傍隱淪

其三

自甘成獨往誰復病相憐金盡論交地囊餘解擯篇清
齋芳藥餌華髮媚林泉不必憂生事深耕種秫田

其四

不謂幽棲處還堪抱膝吟大雲千里駐片雨二湖陰暑
逼藤蘿淺涼生栝栢深鮑山終日在知己媿黃金

其五

未同疎雨至勿翦夏雲繁片華樽前出雙流樹杪翻紅
顏辭上國白眼入中原慢世吾何敢風塵且避喧

其六

拂衣先達怪高枕故人疑世路衡門左軒車負郭遲少年誇解事薄俗諱言詩何處堪遙集悠悠未有期

其七

每逢河朔飲輒憶廣陵濤起色含佳句流光逼濁醪興緣知己盡名豈罷官高髀肉看如此何論長二毛

其八

空林風雨過瀟灑一樽開看竹俄蠲疾飄蓬敢負才杜

門辭問字落日罷登臺不是憐嵇阮誰堪把臂來

其九

夜半忽風雨層樓四望孤雷盤華不注電劃大明湖雲
霧連屏疊蛟龍抱劍呼飛揚天地意垂老見吾徒

其十

何物子虛賦深承漢主知一逢楊得意千載遂同時諫
獵功名薄為郎日月私閒居堪避事稱病足逶迤

其十一

更閱人間語誰堪出處同江湖星自客詞賦日猶工物
色餘爭席生涯見轉蓬延陵皮相士竟失被裘翁

其十二

白頭明日事君不見交情千載論知己中原命友生青
雲高病色滄海傍詩名一為彈冠誤徒令國士輕

秋日村居

八首

隱几憐清曉開軒命濁醪西風行薜荔白露綴蒲桃氣
逼蟬聲苦天含雁影高壯心堪自見秋色正滔滔

其二

病色還相假秋光溘自開清羸堪傍竹潦倒重銜杯返
照湖邊盡浮雲海上來即今知九辯無處不悲哉

其三

秋意長西北岌嶢望裏分青含仙署雨白動帝鄉雲屈
宋終難達巢由故不羣江湖三十載搖落好誰聞

其四

南山伏枕前北渚濯纓邊林薄秋逾厲雲霞曉自鮮談

詩成白首把酒望青山萬里中原色蕭條此地偏

其五

不必知名姓中原一病夫柴荆存古色藥餌泥窮途落
日懸魚笥西風纏輓轡生涯君自見百畝白雲湖

其六

高齋清自掩遙夕病相看片月花間淨明河樹杪乾流
螢含火著宿鷺抱霜寒何限同袍意江湖坐渺漫

其七

白雲不搖落湖上長悠悠世事銜杯過人情把袂休秋
光閒自老日色澹相愁況復多風雨蕭條獨倚樓

其八

搖落唯高枕風塵且閉關醉來雙白眼病起一青山交
態元難作詩名已自閒有人湖海上無事馬蹄間

冬日村居

四首

高卧堪人事幽棲豈世情老松寒更拙片竹冷逾擁
褐江湖色鳴琴雨雪聲嬾心常近傲不是學莊生

其二

百年長藥裏三逕且蓬蒿
華髮抽簪短青山伏枕高
漂零知濁酒雨雪見綈袍
似解冥鴻意翻然變羽毛

其三

寒光不可望蕭瑟掩柴扉
宿霧含霜苦斜陽帶雪微
清齋宜病色生事合漁磯
欲奏滄浪曲江湖此調稀

其四

遙夜憐幽獨南山傍
戶庭泉流霜下白
野色海邊青風

亂將殘燒寒疎欲曉星偶因樵唱起延眺及林垞

寄華從龍比以魚橘見致

多少人間事誰能便作書罷官君更早謝客我何疎八月來吳橘三江下楚魚因風裁數字一問子雲廬

月

不是山中月誰能坐鬱陶蟾孤憐凍影兔老愛霜毫暈疊金波動寒侵玉樹高為題團扇句千里寄同袍

和殿卿神通寺見貽之作

花宮留妙唱綵筆遍高僧說法從初起談詩出上乘五
言爭刻燭一字了傳燈玄度前身是風流益可憑

同許右史遊南山寺宿天井寺

古寺馬蹄前荒山斷復連階危孤石倒屋響乳泉懸喬
木堪知午迴峯半隱天不因許玄度誰此得攀緣

龍集寺

紺林窺壑險一逕入雲愁峯落青蓮色燈懸白日幽香
臺高枕出澗水閉門流聞道羣龍集明珠自可求

錦陽川九塔寺觀許右史碑

名山諧夙好況復近吾廬嵐影浮斜照茲川錦不如空
林雙樹老寒塔九華踈一片頭陀石新文六代餘

元日

五十江湖客風塵一事違漁樵供藥餌雨雪掩荆扉白
髮詩篇苦清齋病色微平生拚縱酒今日不知非

立春前夜齋居殿卿攜具見枉

茅齋殘雪在新月況當門春動西園益寒空北海樽詩

篇閤自遣交態老難論似覺行廚色能清病客魂

立春日齋居對雪憶元美

齋居何所作春雪是佳期淨入年華淺光含暝色遲鳴
絃流豔曲拂簡暎新詩此夕山陰客扁舟興可知

龔生初度與郭子坤集開元寺餞許右史

論交三十載此地重尋盟夏臘高初度人天戀遠行青
蓮澄筆彩白馬識經聲曾是春山夜談禪對友生

逃暑

無處堪逃暑高樓坐夜分河流纏宿霧電影迸重雲紈
扇含冰彩珠簾網露文漢宮多貴幸何以答南熏

暴雨

西來氛甚惡夏至此何祥雨伏千厓怒風迴萬壑長雷
聲盤暗牖電影纏空梁少選虹霓出園林媚夕陽

寄子與使君

二首

一郡看如此扁舟意若何白雲天目遍春水太湖多怪
事寧詞賦幽人自薜蘿平生無俗客三逕許誰過

其二

我輩還堪見人間已厭聞大都常謝客不次各離羣病
酒仍耽句青山自白雲春來論數子飄泊有如君

龔克懋託疾不肯入試賦贈

似得冥鴻意兼深抱壁情一鳴堪自矢三獻轉相輕白
雪看前輩青雲讓後生已須橫四海且復愛連城

寄懷余德甫 二首

豈亦逢秋色登臨若遠行江通灌嬰井山到越王城何

見非交態難言一宦情大東千里月石鏡好同明

其二

即聞彭蠡雁應上武陽臺華髮文章到青山放逐回時
名堪下榻秋興足銜杯不是求羊輩蓬蒿斷往來

二月十五日誕子

三十盧家妾明珠報使君國香元有種天馬自超羣月
應懸弧滿春迎翦絨分負薪還爾事豈敢望青雲

席上別王吳徐宗四子

仙吏滿蓬萊
離筵氣色開
檐帷寒食過
風雨太行來
一失中原遇
難論我輩才
華陽猶駿馬
涓者載金迴

答元美喜于鱗被召見寄

二首

十年君所見
已分老蓬蒿
安得浮名在
將無執事勞
海鷗羣自下
天馬步元高
五柳還須種
徵君不姓陶

其二

那堪成僻性
非不愛明時
白髮終憐我
青山好屬誰
連城高一抱
流水妙相知
君自牆東客
行藏豈更疑

過呂梁

十年稱病客擊楫在樓船
漸下波方溜風鳴水正懸
青山高卧裏白髮壯遊前
起色聊相假終慙傲吏賢

宦情 二首

初服終能事徐生已自違
浮雲知失計漚鳥見忘機
越酒經春老江魚入夏肥
他鄉如不病一任宦情微

其二

我輩誠何意于今自解難
壘寧知衆嫖儂已罷新歡
白

雪狂歌盡青雲病疏看江湖終日在一任宦情闌

劉太保文安公輓章

十首

上公霑異典美謚表餘恩文並三光麗安同五嶽尊朝
廷先達在社稷大名存廟議當時事稱天有世孫

右贈謚

遣奠煩容物臨軒憶典型祠官開正寢法從輟明廷
几知存問鍾彝藉寵靈老臣如就饗帷幄見談經

右諭祭

使從三省至地自九原開不作祁連象寧知漢代才佳
城跑躑躅法駕擁徘徊文劒今埋照于焉燭夜臺

右賜葬

國史從王事經筵飫帝慈龍章紆後寵魚水見前知雨
露含天藻山河勒制辭門生堪視草猶作起家疑

右頌誥

峴首羊公石千秋淚不禁孤墳寒自出華表鬱相臨陰
雨龍文動風霜鳥跡深更聞辭妙絕一字可生金

右立碑

自復遺書出相傳片字工史才依晉乘詩調託唐風草
疏回天力談經發聖聰少年耽作賦頗欲擬河東

右遺文

祠堂何所有遺像鹿臺山為是懸車處常聞曳履還諸
生從上黨三老自壺關伏臘蘋蘩外談經俎豆間

右特祠

諸劉稱令族羣從復清操家自駒千里人皆鳳一毛文

章爭左袒禮樂盛東曹五世傳經術推公甲第高

右世科

一時求舊德千載憶皇都北斗高元氣南山永帝圖青
雲餘几杖白首自江湖此日乘驄客閭門意不孤

右達尊坊

小子元吾黨前賢亦故鄉春秋存俎豆日月望宮牆血
食堪千載精靈自一堂唯應楊伯起秦晉鬱相望

右從祀鄉賢

再過子與

浮名難自托佳會豈相圖
日月高詩社河山壯酒壚
歲星時一出白雪調元孤
繾綣非為佞風流不可無

七言律詩

送趙戶部出守淮陽

仙郎起草漢明光
幾載軍儲事朔方
五馬新為淮海郡
三臺舊署度支章
行車麥秀隨春雨
卧閣花深對夕陽
時憶上林詞賦客
鴻書遙下楚雲長

崔駙馬山池燕集得無字

主家池館帝城隅，上客相如漢大夫。
十里芙蓉迎劔舄，一樽風雨對江湖。
橋邊取石鯨飛動，臺上吹簫鳳有無。
向夕不堪車馬散，朱門空鎖月明孤。

送彰德陳使君迎侍浙中

帝里初分郡檄回，便迎青鳥建章臺。
東方千騎風雲下，南國雙帆河嶽來。
公子西園池上讌，使君秋憲府中才。
鄴天露冕行春日，更許何人托乘陪。

送郭子坤下第還濟南

華省栖遲白髮新，因憐失意轉憐春。
樽前病起逢寒食，客裏花開別故人。
賦就自堪生顧盼，才高豈合老風塵。
燕臺郭隗君家事，不擬驂騑不致身。

送王郎守安慶

花滿吳姬春酒樓，使君五馬五驂騑。
明光起草推高第，三十專城領上游。
天柱西懸江漢影，海門東控帝王州。
到來紆畫思，同舍萬里風烟白雁秋。

送豐城杜少府謫滇南

共惜投荒萬里天
當朝起草事空傳
主恩綠鬢神仙尉
客夢青雲侍從年
盤水秋帆開瘴癘
黔陽春樹隔風烟
孤臣自有豐城劍
遙夜思家向斗邊

酬谷明府見寄

清時詞客滿公車
獨向飄零歎不如
老去已拚常縱飲
秋來何意為裁書
薄遊更自淹華省
多病惟堪返敝廬
共道子雲長筆札
知君近日五侯疏

秋前一日同元美茂秦吳峻伯徐汝思集城南樓

萬里銀河接御溝，千門夜色暎南樓。
城頭客醉燕山月，笛裏寒生薊北秋。
胡地帛書鴻雁動，漢宮紈扇婕妤愁。
西風明月吹雙鬢，且逐飛蓬賦遠遊。

送孫郎中守承天

鬱蔥佳氣漢江邊，今上龍飛北極年。
過幸沛宮三日飲，裁留郢曲大風篇。
仙郎珂散蓬萊月，太守帷開橘柚天。

明到為存湯沐邑須知父老借才賢

劉員外家宸翰樓

君家司寇此樓居奕葉承恩片帖餘帝自經筵傳翰墨
人從冊府見圖書烟雲繞檻生春色牛斗開函散楚墟
弦誦只令諸弟滿韋賢相業好誰如

送劉員外使黔中

牂牁萬里越王臺北眺中原秋色來江嶂忽分三楚斷
海天不盡百蠻開白雲使者乘輅過金馬祠官擁節迴

為泛昆明誇上苑
令知漢主自雄才

送大司寇之金陵

聞道銅標護百蠻
當朝共擬伏波還
來持滇海中丞節
入領西曹法從班
曳履春雲高北斗
迴車秋色照鍾山
顧期門客江城滿
草奏時時達漢關

送皇甫別駕往開州

銜杯昨日夏雲過
愁向燕山送玉珂
吳下詩名諸弟少
天涯宦跡左遷多
人家夜雨黎陽樹
客渡秋風瓠子河

自有呂虔刀可贈開州別駕豈蹉跎

送瑞安劉明府

劉楨詞賦不羣才百里新承漢寵迴吳地青山飛舄下
大江秋雨掛帆來白雲堪贈神明宰海色遙臨睥睨開
到日自逢花滿縣更憐春樹接天台

送許元復還姑蘓

薊門鴻鴈滿高秋張翰思家罷遠遊入洛故人名下士
渡江寒夢雨邊舟客來白髮誰相憶賦就黃花不可留

興發鱸魚堪自釣
吳楓搖落未須愁

署中有憶江南梅花者因以為賦

欲問梅花上苑遲
座中南客重相思
開簾署有青山色
對酒人如白雪枝
驛使書來春不見
仙郎夢斷月應知
偏驚直北多烽火
昨夜關山笛裏吹

與茂秦金山寺亭上望西湖

孤亭遙上翠微重
檻外空林何處鐘
秋到諸天開薜蘿
湖連雙闕散芙蓉
雲光忽落鼉鼉窟
雨色飛來鸞鷟峯

自信登臨能作賦肯令陶謝不相從

送汪伯陽出守慶陽

中原萬騎卻胡兵客領銅符塞上行
大漠清秋迷隴樹黃河落日見秦城
邠人自美西羌俗漢守誰高北地名
郡吏可能無薦達還令介子乞長纓

送黃侍御按滇中

去矣乘風瘴癘開西南萬里壯遊哉
登臺越嶺山形合攬轡昆明秋色來
周禮職方天外盡漢臣封事日邊迴

征蠻幕府今凋落安得樓船下瀨才

送包大中長蘆知事

九河水流何濺濺君去春花車馬前入幕官僚清宴久
揮毫渤海白雲天相將牛酒勞從事未少魚鹽給俸錢
此去陸沈無不可于今薊北靜烽烟

除夕

幾年仙省白雲間此夕歸心醉裏閒九塞烽烟連北極
千門雪色照西山還知傲吏能違俗未擬浮名好駐顏

長孺淮陽令不薄春花或恐滯燕關

元日早朝

禁城春色引朝天接跡夔龍近法筵雲裏金莖通御氣
宮中玉樹隱祈年西山亭障遙臨薊朔漠旗旗滿護燕
聞道至尊歌白雪小臣還獻郢人篇

早春得汝思蜀中書

萬里誰傳錦字迴楚天搖落正堪哀揚舲巫峽江聲合
立馬岷峨雪色來西極使星遙入部中原人日好登臺

莫言羽獵誇胡後不數揚雄作賦才

送惲負外按察郢中

醉擁驪駒不可留送君花發鳳凰樓青春開府西陵色
到日登臺北雁愁寒雨遠分荆楚望白雲無盡漢江流
共知人世悲難合儻得隋珠莫暗投

初春元美席上贈茂秦得闕字

鳳城楊柳又堪攀謝朓西園未擬還客久高吟生白髮
春來歸夢滿青山明時抱病風塵下短褐論交天地間

聞道鹿門妻子在祇今詞賦且燕關

送大中丞王丈赴山東

天下軍儲飛輓來中原胡虜戰爭回漢柱舊題驄馬使
名家接武佩刀才按章時拂風塵入憲府秋臨海岱開
主恩偏憶嚴城日什二東秦保障哉

答宗考功齋居見贈

金莖夜擢建章高漢主祈年祀事勞仙吏詩投青玉案
故人秋卧白雲曹此生湖海供多病何物風塵抵濁醪

中散近來疎嬾甚更無書札到山濤

呈大司寇何公

漢臣韋氏有玄成舊德中朝曳履聲督部曾持滄海節
總戎親破綠林兵重瞻執法臨天座自失流言荷帝情
千載雲蒸龍變日更期文劒署高名

再呈何公

幾年開府漢中丞去後功名何武稱荆楚軍儲遮海過
潢池兵氣向秋澄尚書北斗天猴舌司寇西曹帝股肱

耆舊即今推濟美清朝劒履坐相仍

春夜同元美子與子相過公實

西山落日照金莖北闕春陰覆禁城湖海百年今夜酒
風塵五子異時情和來白雪俱高唱自附青雲起大名
不獨諸郎闕象緯真人應更為東行

送萬言卿明府之長興

逐虜將軍度漠回黃金猶自滿燕臺請纓慙我為齊客
製錦多君更楚材城上春雲天目出簾前秋色太湖來

弦歌暇日能相憶
花裏新詩過鴈裁

送范敬甫之閩中

共看驄馬使君賢
開府東南日月偏
海嶠秋陰分越樹
人家雨色散閩天
朝廷記憶江城久
詞賦知名水部前
還擬主恩頭白裏
時危相贈祖生鞭

五日同子與子相過公實時公實在告

空堂隱映石榴殷
花裏幽期白晝閒
染翰風雲隨上客
開樽雷雨過西山
賦成敢避能驚座
酒罷何妨善閉關

況值懷沙千古怨那堪騎馬獨醒還

韋氏池亭同元美子與子相賦

四首

貫酒新豐解佩刀相逢意氣為君豪孤亭晝敞杉松色
亂石青含薜荔高自向風塵偏勝蹟豈令湖海傲吾曹
從他桂樹山中發招隱何勞更反騷

其二

華髮文章愧不工獨憐諸子調相同西京矯矯多奇氣
東海泱泱自大風三署仙郎攜酒後一時詞客此亭中

白雲寥廓迷幽薊
騶衍談天碣石宮

其三

幽亭斜日亂松聲
下有滄浪可濯纓
求友花間黃鳥出
垂天城上夏雲生
梁園作賦千年事
河朔銜杯萬古情
莫恨風流吾輩晚
鄒陽袁紹漢時名

其四

韋曲高臨漢苑開
城南連騎紫宸回
閉門流水花間過
倚檻青山席上來
客難似矜能避世
子虛誰見不憐才

若論承寵無先後安得吾曹共酒杯

送張元諭虞部謫常州別駕

賦就黃花別季鷹還從遷謫問飛騰
懸知漢柱名當藉況復虔刀事可憑
寒雨大江臨楚望千家秋色暗毘陵
闔閭城外逢搖落何限吳山客裏登

送吳人陸之箕

客有登臺賦遠遊薊門金盡坐高秋
總憐岐路無知己不向風塵為白頭
木落毘陵看過鴈月明張翰倚扁舟

未將簪紱論多病
草色姑蘓到自愁

送李司封謫廣陵

明光起草羨青春
服藥求仙笑此身
白首雲霄空薦士
黃金湖海未逢人
廣陵鴻鴈來秋色
寒雨江楓度逐臣
見說故園湘上水
嬾將詞賦弔靈均

滄溟集卷七

欽定四庫全書薈要卷一萬七千一百三十一集部

滄溟集卷八

明 李攀龍 撰

七言律詩

送王侍御

看君繡斧秣陵迴烏府遙應接鳳臺寒雨鍾山千水下
白雲秋色大江來時危攬轡中原出日近封章北極開
當道狐狸何足問邊城今有郅都才

同元美與子相公實分賦懷太山得鍾字東順

甫

域內名山有岱宗側身東望一相從
河流曉挂天門樹海色秋高日觀峰
金匱何人探漢策白雲千載護秦封
向來信宿藤蘿外杖底西風萬壑鐘

同子與登湖上臺

大漠蒼蒼鴻鴈迴中原極目思悠哉
白雲雙闕湖邊出落日西山樹杪來
詞客百年相對酒秋陰萬里共登臺
側身戎馬經過地城柝朝聞暮角哀

十五夜子與明卿見過

日落青梧白露生
倦遊詞客鳳凰城
千門過鴈來秋色
萬里銜杯對月明
上苑寒高金狄掌
西山影靜羽林兵
解顏今夕無烽火
二妙何當罷請纓

同徐吳二子弘法寺臺眺望

搖落偏驚祗樹林
白雲鴻鴈亦蕭森
何知潘鬢淹郎署
但許燕山壯客心
欲雨諸陵來朔氣
西風千里動秋陰
悲哉聯壁登高賦
徙倚荒臺見古今

送大司寇應公歸台州

搖落黃金駿馬臺，都門供帳亦賢哉。
炎荒想見乘輅出，北斗旋聽曳履回。
秋色白雲生海嶠，主恩華髮卧天台。
西曹官屬銜知遇，東閣清時好再開。

送殷正甫

并引

正甫檢討有河洛之役，蓋濟南諸君子出餞焉。是行也，問誰治祖，則廷尉史張嵐氏問誰相禮，則大司農官屬洪遇伯時問誰贊事，則

許殿卿邦才將試於大宗伯至也正甫則稱
使臣哉齊魯於文學其天性即今日里黨可
謂多賢司馬長卿自漢庭遊梁鄒陽枚叔間
相得驩甚也乃比部李生以贈言

中州一望氣雄哉北極風塵使節開卜落自存宗子計
遊梁更見長卿才春晴嵩少雲邊出雪盡黃河天上來
在昔孝王誇授簡何當置酒向平臺

徐子與席懷梁公實

共指金莖雪色間鳴珂當日滿朝班即看徐孺能懸榻
豈謂梁鴻更出關薄宦天涯成白首故人江上買青山
嶺南梅樹今堪折贈我寧無驛使還

懷子相

薊門秋杪送仙槎此日開樽感歲華卧病山中生桂樹
懷人江上落梅花春來鴻鴈書千里夜色樓臺雪萬家
南粵東吳還獨往應憐薄宦滯天涯

朝退同子與望西山霽雪懷南海梁公實廣陵宗

子相

騎省秋來歎二毛
還將白雪向君操
千峰曙色開金掌
並馬寒光照錦袍
空翠欲浮仙闕動
晴雲猶傍帝城高
初疑大庾梅花發
忽憶揚州八月濤

歲晚贈子與

南國鴻書杳不聞
相看梅發尚離羣
天涯薄宦堪知我
世上虛名好誤君
抄歲西山逢雨雪
懷人漢苑見春雲
往時載酒揚雄宅
諸子談經坐夜分

人日與伯承集子與宅得胡字

新知握手鳳城隅，莫嘆春來滯宦途。
萬里風煙人日過，十年江海客星孤。
漢宮戴勝傳王母，薊北登高愧大夫。
曾是舊游行樂處，解貂同醉酒家胡。

張駕部宅梅花

仙郎雪後建章迴，清夜西堂擁上才。
笛裏春愁燕塞滿，梁間月色漢宮來。
即看芳樹催顏鬢，莫厭寒花對酒杯。
共憶故人江北望，因君賦罷倚徘徊。

宣武門眺望

白雲千里接胡天
雙闕遙臨碣石懸
漢苑春生多雨雪
薊門晴色滿寒烟
五陵佳氣蓬萊外
大漠青山睥睨前
夙昔黃金收駿馬
高臺空作有誰憐

送范大澈

十載風塵道路難
天涯金盡俗相看
自憐華髮馮唐老
誰問綈袍范叔寒
病起清樽開雨雪
歸來春草徧長安
故人海上悲搖落
擬共秋濤把釣竿

葛丈山房

少宰山房北海隅千林窈窕白雲開倚窓河勢鉤盤出
拂檻秋陰碣石來魯國諸生紛受易漢廷多士滿題才
臨流重憶乘槎客濯足還登萬里臺

寄子與

薊門春散紫宸班千里襟帷動客顏秋到白雲生漢署
雨來寒色滿燕山仙郎書札遙相憶吏風塵且未還
天上即今看舊好誰憐曼倩謫人間

寄吳舍人魚呈徐子與

薊門春酒別同袍
念我風塵解佩刀
楚客久無鸚鵡賦
舍人殊有鳳凰毛
書來月色漳河滿
北望秋陰漢闕高
行矣舊遊還自愛
偉長今在白雲曹

寄正叔

十年裘馬向飄零
一郡風塵出漢庭
塞北嵐煙春浩浩
薊門山色樹冥冥
懷人西署秋雲白
對酒踈燈夜雨青
莫道揚雄長寂寞
桓譚已見太玄經

趙州贈許使君

山雨蕭蕭曙色過，異鄉攜手問蹉跎。
豈緣知己朝廷少，自是詞臣岳牧多。
宋子城高臨大陸，漢王臺迴出滹沱。
風塵行役君須見，能得花前不醉歌。

送譙比部還順慶

歸去嘉陵江上春，襜帷不復厭風塵。
巴山漸出雲連楚，劔閣迴看雪照秦。
歲晚江湖多病疏，時危裘馬倦游人。
明光起草君無薄，漢主恩深侍從臣。

送申職方還魏縣

山中春色懌漂零澤畔行吟見獨醒縱使馮唐淹省署
還如汲黯在朝廷漳河雨雪襜帷黑大漠風塵燧火青
憶爾時危曾抗疏至今諸將說龍庭

同張滑縣登清風樓

層樓落日倚蹉跎明府高軒載酒過檻外秋陰開大陸
簾前樹色散漳河關門紫氣臨燕滿風雨青山入晉多
我醉欲裁王粲賦故園戎馬近如何

郡閣懷王徐二比部

曉漏鳴珂謁建章
春風載酒出長楊
詞華並數西臺妙
握草同稱大國香
玉樹月明堪自倚
金莖秋色坐相望
故人為郡逢搖落
日夕看雲憶帝鄉

郡齋與舍人賦

漢臣春散建章宮
此地相逢歎轉蓬
落日開樽漳水上
清秋擁節太行東
微官愧我潘生拙
作賦多君楚調工
朋好即今三署滿
故人猶滯右扶風

送顧天臣還姑蘇

落魄看君旅食年，風塵裘馬竟誰憐。
歸吳擬著潛夫論，入洛還攜贈婦篇。
少室夏雲憑檻外，太湖秋色挂帆前。
故人為客遙相念，垂老浮名薊北天。

郡城樓送明卿二首

西來山色滿城頭，東望漳河入檻流。
傲吏歲時頻卧閣，故人風雨一登樓。
亂離王粲逢多病，著作虞卿老自愁。
君到長安相問訊，誰憐五月有披裘。

其二

徙倚高樓問索居故人湖海意何如樽中十日平原酒
袖裏三年薊北書大麓夏雲當檻出石門寒雨過城疎
明朝遠道空相憶那得仍停使者車

於郡樓送茂秦之京

把酒高樓眺暮春孤城落照濁漳濱自憐白髮常為客
誰道青山不負人西署詩名干氣象中原宦跡任風塵
元龍未下當時傲湖海看君意轉親

登黃榆馬陵諸山是太行絕頂處

四首

太行山色倚巔巔絕頂清秋萬里看
地坼黃河趨碣石天迴紫塞抱長安
悲風大壑飛流折白日千厓落木寒
向夕振衣來朔雨關門蕭瑟罷憑欄

其二

西嶺秋高大陸前馬陵寒影踏遙天
羣峰不斷浮雲色絕嶂長留落日懸
地險關門銜急峽山奇削壁挂飛泉
何人更遇青泥飯有客空歌白石篇

其三

西來山色照邢襄
北走并州擁大荒
巨麓秋陰沙渺渺
石門寒氣雨蒼蒼
天邊睥睨懸句注
樹杪飛流挂濁漳
搖落故人堪極目
朔風千里白雲翔

其四

千峰郡閣望嵯峨
此日褰帷按塞過
落木悲風鴻鴈下
白雲秋色太行多
山連大陸蟠三晉
水割中原散九河
回首薊門高殺氣
羽林諸將在橫戈

答元美病中見寄并示吳舍人

短髮青春照濁醪，因君忽憶廣陵濤。
露華遙對金莖渴，秋色驚看玉樹高。
伏枕風塵雙白眼，緘書湖海一綈袍。
何人更為憐同病，楚客參差長鳳毛。

早春寄元美

薊門霜雪意何如，回首風塵見索居。
病後五陵春草色，愁中三輔使君書。
時名轉憶潘生拙，世事能令阮籍疎。
最好拂衣江海上，故園戎馬重躊躇。

登邢臺

郡齋西北有邢臺落日登臨醉眼開
春樹萬家漳水上白雲千載太行來
孤城自老風塵色傲吏終慚岳牧才
便覺舊遊非浪迹至今鴻鴈薊門回

趙州道中憶殷卿

憶爾檐帷出牧年風塵誰識使君賢
政成神雀猶堪下興盡冥鴻遂杳然
樹色遠浮疎雨外人家忽斷夕陽前
重來此地逢寒食何處看春不可憐

真定邸中重憶殿卿

客舍題詩日已曛當時此地重離羣
青樽夜倒潯沱月紫馬秋嘶大陸雲
春色那堪愁裏望絨書何意病中間
依然趨府諸年少不見風流許使君

郡城西樓

使君杯酒郡城樓倚檻高臨落日愁
河朔浮雲連巨麓太行春雪照邢州
自憐叔夜常多傲無那相如故倦遊
畫省少年人所羨風塵豈亦念淹留

郡齋

金虎署中誰大名我今出守邢州城折腰差自強人意
白眼那堪無宦情世路悠悠幾知己風塵落落一狂生
春來病起少吏事擬草玄經還未成

春興

東南殺氣日相纏重憶先朝海晏年使者自歸沈璧馬
將軍誰起護樓船旌旗愁動昆明色大鉞高懸薊北天
坐使越裳來白雉更追驕虜過燕然

寄劉子成

書札清秋問解攜
郡齋吟眺楚雲低
大夫持憲臨諸粵
使者徵兵出五溪
白日自流荒徼外
青山不盡夜郎西
於今萬里看銅柱
何意中原厭鼓鼙

懷元美

白雲何處一開尊
山色看君滿薊門
落日蕭條迴朔氣
清秋偃蹇向中原
舊知太守齊狂士
不佞扶風漢大藩
病渴自銜金掌露
將因著賦乞文園

懷明卿

清秋羽檄薊門城
楚客登臨短髮生
已厭風塵多病色
何妨侍從有詩名
憐才欲薦雲中守
抗疏先論海上兵
此日主恩深顧問
還如方朔在西京

懷子相

薊門秋氣動鳴珂
蕭瑟東南海賊過
亂後人才掄欲盡
留中啓事草如何
裁詩漢署青天色
伏枕燕山落日多
豈亦念余經術淺
明年投劾罷京河

懷子與

登高作賦大夫哉
搖落江南重可哀
染翰白雲天目出
振衣秋色太湖來
吳中父老紛相難
海上樓船戰不回
再入承明君莫厭
薊門猶有故人杯

懷順甫

西曹羣少舊相求
載酒燕山幾壯遊
綵筆憑陵迴落日
白雲蕭瑟坐高秋
風塵混合中原色
江漢長懸萬里流
自是歲星人不識
於今蹭蹬守邢州

懷公實

明光起草自高名復羨梁鴻出漢京白日顧瞻雙鳳闕
青春卧病五羊城人間已見新詩滿海上還聞大樂成
應笑舊時同舍客風塵請郡愧平生

送張肖甫出計閩廣

二首

聞道天書出漢宮君才博望遠相同少年章奏郎官裏
大海樓船使者中度嶺春陰生白瘴及閩秋色暗青楓
懸知諸將平胡日聖主先論轉餉功

其二

司農飛輓七閩開芻粟如山百粵來落日中原看倚劒
清秋大海傍登臺三城羽檄單于過十道軍儲使者迴
郎署即今多顧問誰憐魏尚有邊才

真定道中遇伯承戶曹

滹沱冰合大風鳴馬上寒雲護北征我自朝天稱四嶽
君還謁帝入承明黃金結客樽前盡白髮先春雪裏生
握手不須悲物役梅花搖落故園情

真定大悲閣

高閣峻嶒倚素秋，西山寒影掛城頭。
坐來大陸當窓盡，不斷滹沱入檻流。
下界蒼茫元氣合，諸天縹緲白雲愁。
使君趨省無多暇，暫爾登臨作壯遊。

初至京與元美明卿子與分韻二首

邢州計吏入長安，春色西山雪裏看。
天地容吾常落魄，風塵對爾一加餐。
重來省署青雲隔，不散關門紫氣寒。
握手依然無長客，可知千載和歌難。

其二

北風吹折九河冰
五馬如龍度李膺
把袂中原來氣色
開樽碣石倚憑陵
明堂大集周方岳
列郡深慙漢股肱
詞賦祇今吾黨在
將因顧眄一先登

除夕元美宅

蓬萊佳氣舊霏微
把酒千門朔雪飛
繾綣綈袍回夜色
縱橫綵筆動春暉
何來天地愁相向
自信風塵意不違
漢主明朝還受計
君看五馬賜金歸

送陳比部使閩中

西曹詞賦有陳琳
南去其如草檄心
百粵大雲搖海色
九峰寒雨壯秋陰
將軍盪寇功名薄
使者銜恩日月深
華髮總淹三輔吏
風塵何處不蕭森

留別元美輩四子

華髮西來謁帝遊
風塵莫問使人愁
但看詞賦青雲色
不盡江河白日流
杯酒千山迴大漠
春花五馬入邢州
黃金愧我無經術
歸去冥鴻未可求

送明卿謫江西

海上風塵未罷兵如何嚴助厭承明故人慘淡浮雲色
逐客蕭條白雪晴落日挂帆彭蠡澤清秋伏枕豫章城
詩篇已側當時目不必魚傳抗疏名

將歸郡屬元美出使畿內作此為別

西方千騎至朝宗使者銜恩下九重握手白雲生鉅鹿
離心落日滿盧龍青春上苑還堪醉我輩中原未可逢
雄劍有神君自愛莫令風雨暗芙蓉

郡齋同元美賦得河字

孤城高枕日蹉跎使者乘槎自九河
亂後故人京洛少秋來山色郡齋多
詩名更向風塵起傲吏還能意氣過
我亦平生難盡興開樽無奈子猷何

與元美登郡樓二首其一得秋字

開軒萬里坐高秋把酒漳河正北流
自愛青山供使者誰堪華髮滯邢州
浮雲不盡蕭條色落日遙臨睥睨愁
上國風塵還倚劔中原我輩更登樓

其二得雲字

搖落高樓此對君
天涯不復有離羣
銜杯大麓來秋色
倚檻邢臺過白雲
樹杪人家漳水出
城頭風雨太行分
極知今日同王粲
賦就還應鄴下聞

與盧次楨登大伾山

河朔風塵萬里看
空亭天外一憑欄
夕陽忽送孤城色
高雪遙臨白馬寒
何處浮雲吞大澤
于時紫氣滿長安
我來欲著浮丘賦
此地因君老鶚冠

於黎陽送次梗之金陵謁故陸令

蕭條杯酒對銷魂
河朔諸生爾獨存
書上梁王還寢獄
賦成揚子不過門
大江雨雪千帆出
建業風流六代論
雄劍自憐為客意
左驂寧負主人恩

懷慶道中雪

飛雪長驅使者車
太行愁色滿天涯
虛傳梁苑平臺賦
真作河陽一縣花
流影風前迎劍氣
寒光樹杪澹人家
問津明日知何處
千里西來有漢槎

崆峒二首

風塵問道欲如何二月崆峒覽勝過
返照自懸疏隴樹浮雲忽斷出涇河
長城雪色當峰盡大漠春陰入塞多
已負清尊尋竈竈還將孤劒倚嵯峨

其二

誰道崆峒不壯遊香鑪春雪照涼州
浮雲半插孤峰色落日長窺大壑愁
萬乘東還靈氣歇諸天西盡濁涇流
蕭關祇在藤蘿外客子風塵自白頭

平涼

春色蕭條白日斜
平涼西北見天涯
唯餘青草王孫路
不屬朱門帝子家
宛馬如雲開漢苑
秦兵二月走胡沙
欲投萬里封侯筆
愧我談經鬢有華

寄元美四首

風塵萬里一蕭然
病起相思到各天
忽見南山青草色
還成北海白雲篇
登樓何處逢多暇
開府于今實少年
不是漢庭容汲黯
如君意氣好誰憐

其二

聞君雨雪到青州春盡鴻書未可求
莫問彈冠千載事徒令把袂故人愁
浮雲萬里中原色落日孤城大海流
自昔風塵驅傲吏還能伏枕向清秋

其三

紫塞春風散羽書使君高枕見離居
人間不識胡名馬門下猶傳海大魚
開府少陽還氣色登臺東嶽更何如
遙知醉後吳歌發落日蕭條薄望諸

其四

不盡青山帶落暉
美人何處送將歸
城邊流水清於酒
馬首浮雲曳作衣
春到他鄉還健食
時危獨客漫雄飛
自從二子中原別
回首風塵萬事違

上郡二首

高城窈窕四山開
西北浮雲睥睨迴
鼓角疑從天上落
輶車真自日邊來
防胡尚借秦人策
射石猶傳漢將才
聞道朝廷思猛士
羽書飛過赫連臺

其二

叱馭何來絕塞遊，獨看山色向新秋。
人家漸出層崖樹，客路高盤斷壑流。
朔氣忽隨風雨至，孤城長傍夕陽愁。
五原子弟輕烽火，馬上談經半白頭。

元美望海見寄

白雲東望十洲開，苦憶玄虛作賦才。
大壑秋陰生蜃氣，扶桑日色照樓臺。
波濤漢使乘槎過，風雨秦王策石來。
縱有三山何可到，不如相見且銜杯。

酬順甫見寄

仙郎春思滿漳河天上雙魚寄楚歌
自隔青雲知己盡誰言白雪和人多
山城薄曙輶車發幕府先秋羽檄過
磬折路傍君不見漆園為吏傲如何

人日答汝思

濁酒初開栢葉新醉來高枕任風塵
十年關塞愁中客此日江湖病裏人
青鏡欲催潘鬢改綵花空翦漢宮春
即今萬事抽簪外唯有浮雲傍角巾

再寄元美二首

黃金臺館鬱蒼蒼
遊子高秋總斷腸
萬里浮雲生渤海
千山朔氣壓漁陽
風塵不老江湖色
宮闕新懸日月光
安得與君燕市裏
和歌長在酒人傍

其二

中丞遼海罷登壇
公子紅顏復挂冠
自有綈袍憐范叔
誰從長鋏見馮驩
上書北闕風雲壯
灑淚西山雨雪寒
憔悴儘堪知國士
相逢應作少年看

寄汝思

高秋諸將欲橫行
薊北先開細柳營
萬里旌旗連殺氣
千山鼓角動邊聲
指揮士馬中原合
談笑風塵瀚海清
此日漢軍俱望幸
滿朝應重亞夫名

送歷城李明府入計

春生仙令鷓鴣袍
風雪褰帷擁佩刀
忽憶鳴珂雙闕迥
翻然飛鳥五雲高
朝堂不改燕山色
計吏寧分漢主勞
為政只今多異蹟
須知帝力到秋毫

題少方伯徐公明月軒三首

傲吏高齋海岱開，長留明月照池臺。
白雲湖上秋何處，鴻鴈樽前客自來。
寒色玉壺堪徙倚，流光華髮與徘徊。
西園諸子俱能賦，獨讓應徐鄴下才。

其二

應憐明月滿長安，永夜憑軒萬里看。
秋水乍疑湖外合，白雲猶似署中寒。
繞枝烏鵲星霜色，一曲關山道路難。
此興庾公曾不淺，南樓參佐幾人歡。

其三

湖上風流畫省新，堪多明月少紅塵。
長懸素魄銜金鏡，不減清光抱玉人。
當戶雲生屏自倚，拂牀星動劒相親。
看君如在揚雄宅，搦管玄經合有神。

送俞按察之湖廣二首

檐帷十載使君東，開府還當楚地雄。
江漢日高天子氣，樓臺秋敞大王風。
重瞻執法臨台象，自許論文見國工。
有客儻能鸚鵡賦，莫令才子嘆漂蓬。

其二

攬轡江湖萬里清使君三楚舊知名陽春不是尋常調
明月堪償十五城行省重臣推掌憲中原多事盛談兵
遙憐佐吏耽秋色不淺南樓庾亮情

送張直卿再遷三楚參政

誰言才子竟漂零十載功名滿漢庭前後兩曹推起草
風流百粵讓談經重來方岳分荆楚此去江湖識歲星
明主賜環今日事武昌楊柳幾回青

元美以吳紗見惠作此謝之

西施浣紗江水中下機便入吳王宮憶昔紅顏銷白雪
淒然素手弄秋風新裁薜荔忽無色更集芙蓉應未工
知君贈我視縞帶願言不忘披裘翁

答寄華從龍戶曹

起草當年漢署才毘陵尺素為誰來山中鴻鴈三秋色
江上浮雲萬里臺總是風塵淹伏枕空將日月老銜杯
清時仲蔚非無意謝客蓬蒿更不開

贈符臺卿李伯承出使東藩 二首

漢宮春色照蘭臺
符節分曹右掖開
司馬長卿詞客幸
東方曼倩侍臣才
海濱城闕浮槎下
天上風雲擁傳來
無那故人常伏枕
論詩還為一銜杯

其二

春風紫禁日朝天
帝寵東藩奉使年
直省月臨三殿出
軺車星度九河懸
綈袍忽動青雲色
華髮逾驚白雪篇
莫道古人霄漢少
如君侍從總堪憐

除夕

夜色蕭條雪滿庭，唯應濁酒見漂零。
關門忽散真人氣，滄海還高處士星。
一自倦游拚謝客，遂因移疾罷傳經。
春風明日長安道，依舊王孫草又青。

杪秋登太華山絕頂

四首

華頂峒窈四望開，正逢蕭瑟氣悲哉。
黃河忽墮三峰下，秋色遙從萬里來。
北極風塵還郡國，中原日月自樓臺。
君王儻問仙人掌，願上芙蓉露一杯。

其二

縹緲真探白帝宮三峰此日為誰雄
蒼龍半挂秦川雨石馬長嘶漢苑風
地敞中原秋色盡天開萬里夕陽空
平生突兀看人意容爾深知造化功

其三

太華高臨萬里看中原秋色更漫漫
振衣瀑布青雲濕倚劒明星白日寒
東走峰陰搖砥柱西來紫氣屬長安
自憐綵筆驚人在咫尺天開謁帝難

其四

徙倚三峰峰上頭
蕭條萬里見高秋
蓮花直撲青天色
玉女常含白雪愁
樹杪雲靈沙漠氣
岩前日暈漢江流
停杯一嘯千年事
不擬人間說壯遊

滄溟集卷八



總校官庶吉士臣侍朝

校對官檢討臣王鍾健

謄錄貢生臣蘇曰柄

欽定四庫全書薈要

集部

滄溟集卷九

十九



欽定四庫全書薈要卷一萬七千一百三十二


集部

滄溟集卷九

明 李攀龍 撰

七言律詩

殷太史正甫至自太山為贈

明堂天子昔登壇御道風流擁漢官海色迥臨三觀動
春陰不散五松寒白雲忽向封中出玉牒誰從篋裏看
此日滿朝求禪草相如早晚入長安

又作此問正甫

上宮春色自何年阿閣神房幾洞天
囊裏定攜三秀草懷中曾擬四愁篇
射牛漢蹟今猶在繫馬吳門似杳然
七十二家論祀典還朝可奏聖人前

送吳峻伯之楚

才子風流滿禁林傳經海岱主恩深
諸生自紀銜魚事千里誰知相馬心
王氣日隨江漢轉方城春壓洞庭陰
憐君宦跡偏形勝四十參藩豈滯淫

送朱大中丞召拜少司空還朝

二

執憲登臺海岱東銜恩入拜少司空長安近指迴車日
間闔遙分曳履風北斗秋高玄武署五雲春滿建章宮
懸知魚藻歡無極漢主從容問畫熊

其二

八月仙槎海上行司空謁帝鳳凰城漢庭經術還高第
畫省風流自列卿視草星辰堪動色按章朝野盡知名
況逢麟閣多賢日非復當年折檻情

送崔中甫入對

才子乘春集帝京燕山宮闕五雲生按圖自動千金色
射策還高片玉名清問從容天下事朝廷經略海方兵
一時得意諸年少莫學終軍浪請纓

寄贈漢陽楊明府

方城仙令日為羣各把銅章百里分江漢至今稱楚望
風流何必減諸君東臨黃鶴飛雙鳥西接蘭臺見五雲
早晚主恩誇羽獵滿朝誰不薦雄文

贈李明府暫詣廣川奉送景王之國

帝寵親王出牧年逢迎東道借才賢郎官舊列星辰上
朱邸新開日月邊千乘旌旗分羽衛九河春色護樓船
知君不廢鳴琴興應教還操桂樹篇

和李明府春日馳戀庭闈之作

百里弦歌太岱東美人為政復誰同河陽縣裏花常滿
北海樽中酒不空製錦還看成麗句裁斑忽憶舞春風
何妨問寢憑雙鳥擬送王喬入漢宮

酬朝城張明府和御史中丞蘇丈秋興見寄

聞君為縣武城傍花裏絃歌不下堂佳政日來多薦疏
美名年少滿詞場揮毫色動郎官宿托簡光搖御史霜
千載並傳秋興賦可知潘令在河陽

送劉侍御歸臺

四首

使者乘秋入建章曉排閭闔侍君王繡衣忽動雲霄色
白簡猶含海岱光自許風霜知列栢還將諷諫托長楊
大東杼柚看如此況復徵兵事朔方

其二

才子高名八使中，登車千里競稱雄。
西臺入奏聞天語，東海陳詩見國風。
伏柱久推三楚駿，還朝爭識五花驄。
極知未盡澄清意，獻納猶堪寵漢宮。

其三

蘭臺使者出長安，風俗三齊攬轡看。
今日殿中玄武仗，須君柱後惠文冠。
彈章氣借山河壯，執法秋臨節鉞寒。
儻值東封陪扈從，舊游偏奉六龍歡。

其四

繡斧東來按部年一時風節萬人傳
烏臺高傍黃圖起青索遙依紫極懸
三殿直聲推許國九河秋色送朝天
正逢宣室齊居日羨爾持書捧御筵

送謝中丞還蜀二首

微垣法象切三台御史中丞憲府開
參執廟堂刀筆吏魚提郡國羽林材
煙塵部索臨東夏節鉞朝恩壓外臺
直擬賊平答明詔誰知投杼自天來

其二

元戎幕府檄書成
枹鼓春風遂不鳴
東觀齊名推李杜
西臺獨坐見澄清
君王更寢中山篋
談笑堪銷渤海兵
暫去恐非高卧日
佇看安石起蒼生

送馮汝言學憲之浙江二首

使者清秋擁漢槎
五雲回首望京華
傳經南國推高第
執憲中朝屬世家
紫氣欲臨滄海日
綵毫先動赤城霞
還披絳帳延諸少
為報西施剩浣紗

其二

儒臣奉詔外臺居況復揚波海晏如門下美才收竹箭
卧中高士羨桐廬山川半入吳都賦風俗魚傳越絕書
始信工文官自達主恩垂老不曾疎

羅山甫自晉徂齊見困鹽官暫詣京師攜家南
還遂有此贈

十載青雲跡漸疎風塵作客意何如服車垂老偏知驥
彈鋏從工不為魚游子千金堪買賦佳人五色漫裁書
江南薊北俱搖落那得樽前憶故廬

重送山甫

短髮蕭蕭日影孤，清秋行色又皇都。
百錢杖底猶懸否？片刺懷中好在無。
老去它鄉惟藥物，愁來佳句滿江湖。
只言倒屣尋常事，不是燕山舊酒徒。

送何戶曹之金陵

江上層臺繞鳳凰，石城秋色正蒼蒼。
黃金不厭東南氣，紫闕猶懸日月光。
帝謂何郎終傳粉，人傳荀令本含香。
即今起草從容處，轉餉風流海一方。

春夜許使君集送江生過謁李伯華太常江善
鼓琴因句及之

君家綵筆美名齊客裏瑤琴重解攜抱膝自高梁甫調
絕絃空老雍門啼冰開華館三魚集月出春城五馬嘶
近報太常深作事相逢應共醉如泥

送方山人

紅顏裘馬客京華十載春風上苑花忽爾壯懷生海嶽
脩然清興滿烟霞已拚白髮投詞社肯惜黃金盡酒家

最是子雲甘寂寞也因奇字識侯芭

送許右史之京

二首

春林鶻鶻鳥嚶嚶花裏開樽送友生華髮我堪雙別淚
綈袍君自一交情白雲欲贈湖中色紫氣遙臨海上城
明日已拚車馬絕不妨書札報柴荆

其二

少年車馬日紛紛老去誰應更識君酒態美如嵇叔夜
詩才清似沈休文曳裾忽動梁園雪飛蓋兼傳鄴下雲

試向樽前看過鴈春風那不念離羣

夏日龔生過鮑山樓

長白山人本種田談經半住嵒湖邊攜來滿甕春城酒
乞得諸生月俸錢倚檻四高滄海氣銜杯一望縉雲天
尋常雞黍休嫌薄不淺交情二十年

神通寺

相傳精舍朗公開千載金牛去不迴初地花間藏洞壑
諸天樹杪出樓臺月高清楚西峰落霜淨疎鐘下界來

豈謂投簪能避俗將因卧病白雲隈

過吳子玉函山草堂

玉函山色草堂偏恰有幽人擁膝眠
樹杪徑迴千澗合窓中天盡四峰連
綠陰欲滿桑蠶月白首重論竹馬年
就此一樽無不可因君已辦阮家錢

酬張轉運龍洞山之作

春山遙上翠微連忽出藤蘿一徑懸
削壁雲霞開五色中峰日月隱諸天
浮漚並結金龕麗飛竇雙銜石甕圓

莫怪驪珠君已得寒湫元自有龍眠

與轉運諸公登華不注絕頂

中天紫氣抱香鑪復道金輿落帝都二水遙分清渚下
一峰深注白雲孤岱宗風雨通來往海色樓臺入有無
不是登高能賦客誰堪灑酒向平蕪

魏使君過宿鮑山山樓分賦

層樓風雨一登臨把酒重論十載心楚客豈須疑白璧
鮑山堪自見黃金塞帷上國風霜滿伏枕中原日月深

忽憶明光曾共被那知萍梗到於今

使君重過山樓分賦得空字

使君千騎入從東此日登臨作賦雄
樹杪平湖元在地簷前疊嶂半浮空
煙霞色借雙轡動牛斗光搖一劍通
自入鹿門常謝客誰能濁酒過龐公

和魏使君扶侍遊太山

中天誅蕩敞天門上帝樓臺拱帝孫
五馬並臨吳觀重諸峰獨讓丈人尊
秦松忽借蒼顏駐海日遙銜紫氣屯

可道黃河看似帶須知西北是崑崙

李伯承謫亳州

十載風流寵漢庭一時才子見漂零
便從天上來真氣縱落人間亦客星
肯惜陽春迴綠綺自愁明月按青萍
江湖我輩堪猶若差可扁舟問獨醒

得元美兄弟書

愛弟何因興太豪逾令四海羨吾曹
金莖並擢青雲秀玉樹雙銜白雪高
江上錦翰排藻疏吳門練影散綈袍

知君難作池塘夢
春色看人引濁醪

答元美

闔閭城上有高臺
海色蕭條對酒杯
千里驂騑堪自老
孤飛鴻鵠一何哀
秋風忽傍扁舟起
明月遙含尺素來
白雪驚人操不得
因君此曲暫徘徊

答王敬美進士

江左風流迥自分
中間小陸更能文
五花欲就龍為友
千里高飛鵠不羣
亂去東南無王氣
愁來西北有浮雲

只今年少稱才子屈指詞林已到君

謝魏使君題白雪樓

白雪新題照畫闌
鮑山堪此對盤桓
楚宮一送江天色
郢曲長飛海氣寒
繞夜朱絃清自語
凌雲綵筆老相看
使君不是元同調
千載陽春和者難

寄右史

聞君天上聽吹噓
薊北春風滿素書
東壁儻難分未照
何門不可曳長裾
即看投散官逾穩
莫笑憐才術大踈

諸子當時堪自見於今意氣有誰如

寄汝南徐使君

美人為政有輝光太守能名讓汝陽此日單車俄罷郡
青春五馬暫還鄉君才堪自風波老上意元從雨露長
篋裏謗書休苦問恐令年少識行藏

吳使君自建寧移邵武

十載徘徊侍從羣銅符更向七閩分且疑落魄終遷客
也自風流一使君五馬忽驚龍渚氣雙轡猶畫幔亭雲

已知才子官難起無那吳郎雅好文

南樓

南樓暇日坐崢嶸白髮從他望裏生
海近雲霞常繞戶山迴風雨動連城
綵毫一散中原色濁酒偏含我輩情
千載陽春須此調少年休說是虛名

白雪樓

伏枕空林積雨開旋因起色一登臺
大清河抱孤城轉長白山邀返照迴
無那嵒生成懶慢可知陶令賦歸來

何人定解浮雲意片影漂搖落酒杯

抄秋同右史南山眺望 二首

青樽何處不蹉跎白髮相看一醉歌坐久鏡中懸片華
望來城上出雙河杉松半壁浮雲滿砧杵千家落照多
縱使平臺秋更好故人猶恐未同過

其二

回首飛鴻碣石標清霜處處錦林凋層巖倒映平湖淨
積翠斜連粉堞遙四海交游空老大一時賓客更蕭條

病來苦愛觀濤賦不分梁園此見招

為周明府太霞洞天卷題

太霞高館洞天遙東接蘭津十二橋巖壑盡銜滄海氣
樓臺常對赤城標雲煙五色春相麗金碧諸山夜自朝
仙令怪來工製錦真陽人喜得王喬

贈周真陽明府

仙令風流百里才談經新自蜀天回彩毫忽動梁園色
丹竈還隣葉縣開琴裏春生桐栢水月明人在景夷臺

只今汝潁高賢聚為有郎官一宿來

送魏使君入朝

青春五馬入朝天稍似明光草奏年方岳只今雄海岱
山河原自壯幽燕風雲忽傍檐帷起日月猶臨省署懸
況復政成聞問好黃金不是上恩偏

送魏使君入覲兼呈吳邵武

如雲計吏集神京此日江湖見友生自是古今雙五馬
居然南北兩專城漢廷交映黃金詔楚客同蜚白雪聲

治行不知誰第一獨應巖穴愧高名

為同明卿即承聖天子垂問巖穴德

逸豈復有狂如李生者訪於邵武邵武因自多賢矣

寄贈襄史周象賢

春色高齋萬里生曳裾常日罷逢迎雲霄未報中丞疏
江漢先傳外史名俠客銅鞮多駿馬佳人花艷動傾城
王門自昔棲遲地何限龐公避世情

明溪篇二首贈周都閩

明溪斜帶越臺高遠送清光照錦袍勢奪潮聲雄鼓角

波分海色壯旌旄浮雲深控嫖姚騎秋水常函別駕刀
翻恨普天無戰鬪臨觴不得更投醪

其二

越臺山下小江干一曲遙開漢將壇
搖動星河天上下陣成魚鳥鏡中看
戈鋌忽溢澄潭色組練偏縈素渚寒
此日非熊應入夢心隨渭水到長安

錫山尊賢祠

長史祠堂海一隅諸君精爽夜常俱
懸知震澤珠來往

莫問東峰錫有無前輩風流開俎豆南朝伏臘見松楸
何人不羨秦公子血食賢哉二大夫

秦丈為武昌公建開利寺觀鵝亭

江上新亭接梵臺風流重憶右軍才相攜愛馬高僧過
自許籠鵝道士來池水如披霜練出煙霞猶傍彩毫開
使君暇日多延眺可但南樓興已哉

除夕魏使君攜長君及黃山人見過同賦

三徑蕭條雨雪前使君除夕報周旋檐帷自御元方出

賓客魚攜叔度賢太史定疑滄海氣陽春先動楚宮篇
諸生光寵霑行酒不獨荀家事可傳

與魏使君宿龍洞山寺同賦 四首

迴壑深林繞梵宮春來吟眺使君同空潭忽散三峰雨
暗穴常吹半夜風人擬二龍精自合詩看五馬步逾工
諸天坐失懸鐙色明月先投入掌中

其二

使君春興滿綈袍綵筆青山對濁醪望去天回雙闕迴

坐來雲盡一峰高
蛟龍出入常風雨
鴻鵠拚飛自羽毛
愧我淹留逢楚客
攀援桂樹咏離騷

其三

削成東壁五雲屏
下有龍宮夜不扃
斗柄故臨雙甕轉
月明常對一珠亭
春回竹葉杯光白
天逼蓮花劍氣青
坐久空山仙籟寂
新詩獨為故人聽

其四

秀色中峰獨不羣
藤蘿二月已紛紛
諸天近海金銀氣

雙峽長春錦繡文塔影半空懸落照溪流一曲灑浮雲
縱令洞口龍吟發郢調還須讓使君

寄殿卿

春滿梁園興不孤平臺一望盡平蕪
于時授簡酬知己何處銜杯憶老夫
浪跡已應為客就浮名猶自傍人無
只今慷慨夷門道肯讓蕭條在五湖

答殿卿

莫問看春第幾場
纔魚風雨更茫茫
能無對酒思公子

亦有登樓望故鄉
敢謂馬卿元在漢
何如枚叔正游梁
病來已廢凌雲筆
為愛觀濤擬報章

送翟使君奏最

三臺年少雅相間
五馬邊州老使君
更擁星輶趨北斗
還依露冕拜南薰
政成黃鵠誰云匹
佩有青萍自不羣
海內重名推佐郡
那知詞賦並凌雲

送張轉運之南康二首

此去專城又楚都
遙臨五嶺壓三吳
坐來齋閣江聲合

忽傍檐帷嶽色孤
白晝落星寒
劒氣清秋石鏡滿
冰壺
美人欲報瓊瑤賦
彭蠡春深鴈有無

其二

轉運舊為太僕丞南刑部

轉運風流動海方
僕臣司駕早稱良
齊鹽萬斛乘艘下
冀馬千羣入塞長
廬岳使君新領郡
金陵仙吏舊含香
須知共理勞明主
不但西京數趙張

東張問甫使君

裘馬當時滿漢關
故人誰不羨紅顏
只今湖海窮相傍

可道風塵老自閑
伏枕此身惟濁酒
拂衣何處不青山
與君俱作漂零客
容易今年斷往還

賈明府侍太公

郎官承寵建章迴
海岱春深百里開
經術家傳新息長
風流人羨洛陽才
心同鄴令雙鳬舞
身御于公駟馬來
怪得五雲高列宿
即看南極近三台

贈蓬萊王少府

漢宮清切右曹開
染翰當年屬妙才
天上鳳毛猶五色

斗間龍氣劃雙迴，雲霞春滿千家邑。
山海秋高萬里臺，自是仙郎偏雨露。
總為遷客亦蓬萊。

送耿蠡縣之官

百里初分上谷城，傍臨易水接燕京。
地偏俠客風猶在，天近郎官宿轉明。
北闕青雲懸鳥影，西山白雪入琴聲。
看君三異尋常事，何限當年卓魯情。

酬右史題扇見贈

紈扇新題寄遠篇，纔開篋笥已堪憐。
清風忽自蘭臺至，

明月還從鄴下懸佳客滿堂疎翰墨美人千里共嬋娟
何因懷袖含香署再使君恩出入偏

苦熱因憶右史覽揆之辰作此為寄

河朔風流避暑年平臺此日更翩翩客惟枚叔元稱叟
主自梁王雅好賢兔苑近含蒿少雪鴈池遙動廣陵天
故人苦熱心同渴安得金漿共爾傳

答殿卿書

故人書札到寒溫病起蓬蒿正滿門彭澤妻孥相對老

淮南賓客自言尊頌成濁酒深知德投罷明珠始見恩
莫為尋常招隱士山中轉復念王孫

酬黃山人郡中見懷之作魚呈魏使君

千山佳色郡齋前楚客相思秀句傳白雪調成堪自老
青雲名在好誰憐胡牀夜傍南樓月濁酒春開北海天
羨爾風流陪坐嘯轉令人見使君賢

慰魏使君悼子

郡閣春深種合歡將雛一曲動雙彈寡帷此日驚騎竹

灑淚何人說夢蘭
楚壁自含明月墮
隋珠空抱夜光寒
況逢羸博分符地
片石崔嵬不忍看

陶明府自羅山移東安

仙令風流自汝陽
三臺薦疏滿明光
不緣馴雉聞當宁
那得飛鳬入帝鄉
地近五雲窺製錦
天迴列宿映垂裳
折腰未是君家事
珍重彈琴單父堂

送汪仲安之長沙藩理官

三楚風流總帝鄉
蘭臺池館漢諸王
官貧舞袖旋應拙

老去長裾曳不妨授簡春陰生岳麓開樽秋色動瀟湘
從來此地多才子弔屈還看有和章

九日

九日陶家菊自黃更聞飛鴈搗衣裳誰人對酒能無賦
何處登高不望鄉二水寒光搖落照孤城秋色動清霜
那知極目中原苦數子江湖未盡狂

和余德甫江上雜詠

城下春江繞戶斜誰開三徑俯龍沙客攜彭澤先生酒

人指南州孺子家一劒寒光搖北斗西山秋色送雲霞
只今海內無同調高枕從君老物華

題仙人騎白鹿圖贈魏使君

少室仙人玉不如飄搖來自太林墟已叅白鹿雲中駕
復把青羊洞裏書二女三花相綺麗霜毛短髮共蕭疎
使君何讓臨淮守夾轂雙隨五馬車

答子與病起見寄

青門遙向汝陽分伏枕傳書到白雲已道風波能失所

更逢搖落不堪聞
九歌自我思公子
七發何人起使君
一日齊名千載事
驚心豈獨久離羣

寄題子與使君薜荔園二首

太守為園自一丘
遙看薜荔接滄洲
醉來忽下湘君淚
賦罷深知楚客愁
黯淡欲飛天目雨
蕭條猶帶洞庭秋
惟應日共蓬蒿長
安得聊從仲蔚遊

其二

老蔓成帷網四隣
紛紛落葉雪溪濱
嬋媛初服能無客

窈窕空山若有人，楊柳摧殘彭澤隱。
桃花俗殺武陵春，獨憐遠道難為理。
欲采何由寄所親。

青蘿館二首

十畝青蘿別館開，使君延眺意悠哉。
風搖北渚清陰合，煙雜南山黛色來。
臺敞高秋深染翰，庭虛斜日淨銜杯。
西隣榮叟常還往，帶索應同薜荔裁。

其二

湖上高齋此一時，垂蘿四面繞茅茨。
欲令何處紅塵入，

可道窺人片月疑色借古松成遠勢意含幽石有餘姿
空傳蔣詡開三徑不遇裘羊那得知

寄子與

何言雨雪薊門深明日褰帷是上林湖海弟兄餘灑淚
雲霄詞賦足知音猶堪一起中原色莫使長懸萬里心
不為故人勞問訊十年書札總浮沉

冬日登樓

佳節高樓酒復清鮑山斜日入杯平天涯誰借窮交淚

海內空傳拙宦名
四野浮雲垂雪色
千林朔氣擁寒聲
醉來極目中原盡
獨抱風流萬古情

子與病起移盡二美
吳下羣賢爰修禊事
踴躍勝遊遙為屬寄

伏枕經春憶舊遊
永和三日命扁舟
一時藝苑人亡恙
千載蘭亭事可求
吳下山川何蘊藉
王家兄弟本風流
獨憐搦管傳觴處
有客中原自白頭

魏使君以太公登太山

何言紫氣滿崑崙須信中原五嶽尊南極一星朝日觀
東方千騎擁天門舞衣重染雲霞色探篋深銜雨露恩
試向丈人峰上望徂徠新甫拱兒孫

病甦憶王徐二子

伏枕高樓白日徂夢回春色杳相扶風流轉覺中原盡
海嶽驚看我輩孤寒雪千山雙鬢老浮雲萬里尺書無
也知俱壯觀濤興只是飄零不可呼

答贈廬陵劉山人

西來獻策薊門深
栖泊王家玉樹林
說劍夜高湖海氣
鳴琴秋入薜蘿心
別時春色長相似
歸去浮雲不可尋
萍梗愧君能記憶
十年遙寄白駒音

答寄余德甫

當年草奏栢梁臺
此日漂零濁酒杯
伏枕春陰三楚合
拂衣秋色大江迴
含冤夜識雙龍氣
作賦時推二馬才
極目中原諸子盡
豫章城裏一書來

薛氏瑞室自衡州使君以來不罹火事者二度

君子美之但為題止宜記頌然不可無律體
乃先難以屬和者一首

赤堇山火照城東郭外巍然太守宮舊俗龍蛇元自厭
比隣燕雀竟相蒙獨飛蜀郡尚書雨再反江陵大尹風
四壁遺經亡恙在諸孫往往見文雄

寄憶余德甫

綠筆花生尺素寒西山飛雪正漫漫何來章貢雙江合
並倚雌雄兩劒看無那中原長伏枕可知千載一彈冠

即今寥落陽春曲
滿眼巴人和客難

滄溟集卷九